

佛說安宅神呪經

失譯師名出後漢錄

如是我聞一時佛住舍衛國祇樹給孤獨園與千二百五十比丘皆阿羅漢諸漏已盡身心澄靜六通無礙其名曰大智舍利弗摩訶目捷連摩訶迦葉摩訶迦旃延須菩提等復有菩薩摩訶薩八千人俱文殊師利菩薩導師菩薩虛空藏菩薩觀世音菩薩救脫菩薩如是等菩薩摩訶薩威德自在復有比丘比丘尼優婆塞優婆夷天龍夜叉八部鬼神共相圍繞說微妙法時有離車長者子五十人俱身坐塵土懷憂愁感猶如有人生失父母所愛妻子來至佛所頭面作禮却住一面爾時世尊知而故問諸長者子以何因緣而有惱色憂愁不樂失於常容時諸長者子同

聲俱白佛言世尊未審人居世間叵有家宅吉凶以不佛即答言如是諸事皆由衆生心行夢想所造不得都無諸離車等白佛言世尊弟子等蒙宿緣一豪之福得覩如來慈化無遺開甘露門潤以法雨復有何罪生此五濁極惡之世懷憂抱苦怖懼萬端不捨須臾所以言者自唯弟子德淺福薄所居舍宅災怪頻疊惡魔日夜競共侵陵坐卧不安如懷湯火自頃已來失去善心無所恃怙唯願世尊受弟子請臨降所居賜爲安宅勅語守宅諸神及四時禁忌常來營衛使日夜安吉災禍消滅佛言善哉善哉當如汝說吾自知時爾時世尊明旦勅諸弟子可各整衣服當入聚落各持應器往至長者子舍飯食既畢敷轉輪座爲諸長者說微妙法令離怖畏身心

悅樂時諸離車各生歡喜猶如比丘入第三
禪爾時世尊即呼守宅諸神來到佛所而告
之言自今已後是諸神鬼不得妄作恐動令
某甲等不安恒懷憂怖吾當使大力鬼神碎
滅汝身令如微塵爾時世尊復告大衆諸善
男子善女人等吾涅槃後五百歲中衆生垢
重邪見轉熾魔道競興妖媚妄作闖人門戶
各伺人便覓人長短爲作不祥種種留難當
爾之時是諸弟子應當一心念佛念法念比
丘僧齋戒清淨奉持三歸五戒十善八關齋
行三
戒日夕六時禮拜懺悔勤心精進請清淨僧
設安宅齋燒衆名香然燈續明露出中庭讀
是經典某甲等安居立宅已來建立南房北
堂東西之廂碓磨倉庫井竈門牆園林池沼
六畜之欄或復移房動土穿鑿非時或犯觸

伏龍騰蛇青龍白虎朱雀玄武六甲禁忌十
二時神門庭戶伯井竈精靈堂上戶中溷邊
之神我今持諸佛神力菩薩威光般若波羅
蜜力勅宅前宅後宅左宅右宅中守宅神神
子神母伏龍騰蛇六甲禁忌十二時神飛屍
邪忤魍魎鬼神因託形聲寄名附著自今已
後不得妄燒我弟子等神子神母宅中諸神
邪媚蠱道各安所在不得妄相侵陵爲作衰
惱令某甲等驚動怖畏當如我教若不順我
語令汝等頭破作七分如多羅樹枝爾時世
尊而說呪曰
南無佛陀四野 南無達摩四野 南無僧
伽四野
今爲弟子某甲承佛威力而說神呪
一足衆生莫惱我 二足衆生莫惱我

三足衆生莫惱我

行三

四足衆生莫惱我

十三

我有一切大慈大悲愍念一切衆生汝等四
魔各還所屬不得橫忤擾亂我弟子等復說
呪曰

白黑龍王 善子龍王 漚鉢羅龍王

阿耨大龍王

結界呪文

伽婆致 伽婆致 悉波阿

東方大神龍王 七里結界 金剛宅

南方大神龍王 七里結界 金剛宅

西方大神龍王 七里結界 金剛宅

北方大神龍王 七里結界 金剛宅

如是三說

東方婆鳩深山 娑羅伽 收汝百鬼頸著

伽 南方婆鳩深山 娑羅伽 收汝百鬼

頸著伽 西方婆鳩深山 娑羅伽 收汝

百鬼頸著伽 北方婆鳩深山 娑羅伽

收汝百鬼頸著伽

如是三說

主疾病者主頭痛者主人舍宅門戶者當歛

諸毒不得擾我諸弟子若不順我呪頭破作

七分爾時世尊而說偈言

造宅立堂宇 安育諸群生 園林并池沼

門牆及與園 志心興舍室 動靜應聖靈

稽首歸命佛 衆魔莫能傾 明燈照無極

五眼因之生 法王大呪力 動破魔億千

如來慈普潤 威光徹無邊 我等咸歸命

衆邪各自遷

佛告日月五星二十八宿天神龍鬼皆來受

教明聽佛告不得前却某甲之家或作東廂

西廂南房北堂勅日遊月殺土府將軍青龍
白虎朱雀玄武歲月劫殺土府將軍青龍白
虎朱雀玄武歲月劫殺六甲禁忌土府伏龍
莫妄東西若有動靜燒香啓聞某甲宅舍是
佛金剛之地面二百步佛有約言諸疾鬼神
不得妄忤者頭破作七分身不得全不得水
漿去離本宮宅舍已成富貴吉遷由作大得
所願光榮行來在軍仕宦宜官門戶昌盛百
子千孫父慈子孝男女忠貞兄弟順崇義
仁賢所願如意十方證明行如菩薩得道如
佛佛告阿難若欲安宅露出中庭然四十燈
掃灑燒香一心懺悔禮十方諸佛阿難又白
佛言當何名斯經佛語阿難此經名如來大
悲不可思議神力亦名愍念衆生安宅破魔
神呪佛說經竟大衆歡喜作禮奉行

佛說安宅神呪經